

Bonnemain porscha maun

Il nov uvestg da Cuira metta simbols remartgabels e tschenta novs accents

MARTIN CABALZAR/FMR

■ **«Betg metter la baselgia e sias structuradas en il center, mabain ils umans e lur quitads.»** Quai è stà il messadi principal dal nov uvestg da Cuira Joseph Maria Bonnemain a chaschun da sia consecraziun en la catedrala a Cuira. A la cerimonia èn er stads envidads represchentants d'autras confessiuns, dentant er immigrants, praschuniers e prostituadas. Sco premiera ad ina consecraziun n'han questa giada betg mo umens cun gnefla prendì plaz en il chor, mabain er dunnas che han annunzià il pled (epistla ed evangeli) e prelegì la bulla papala e las supplicas. Il nov uvestg renunzia ad in'atgna vopna episcopala ed el ha preferì il simpel fist d'ivur (pendum) muni cun ina crusch sco fist da viandar antic enstagl dal fist dorà usità. Sin RTR ha Joseph Maria Bonnemain dà da chapir ch'el na dettia betg pais da vegnir titulà sco «eccellenza», cun ses 1.61 meters plitost «ina pitschna purziun».

Il nov uvestg metta accents

En ses pled final, garnì cun ina passascha taliana e rumantscha (!) ha il nov uvestg accentuà la necessitad da la baselgia da daventar «pli modesta, pli umilitaivla, pli sincera e pli transparenta». El na veglia betg ina baselgia che s'occupia da structuradas, mabain ina baselgia che saja maiva al pievel e che s'empatschia dals basegns dals umans. «Cun reproschas, cun cumonds e scumonds n'è gidà nagut, pli impurtant è da motivar, integrar ed accompagnar», punctuescha Bonnemain. En concordanza cun papa Francesco vul il nov uvestg ir la via da la sinodalitad, da la fraternitad e da la decentralisaziun. Scadina plaiv stoppia daventar baselgia integranta che dettia confiart e sustegn als malsaus, a quels che suffreschan, als abandunads, als tschertgaders, als decuraschads ed als povers ed isolads. En ses intermezzo rumantsch ha il nov uvestg bain dubità ch'el possa imprendier rumantsch entaifer ils tschintg onns da ses episcopat, el ha dentant sincerà: «Sco uvestg da Cuira vulesch jau m'identifitgar cun quest chantun e ses pievel, senza tralasar la solidaritad cun la realitad divergenta en noss uvestgieu.»



Il nov uvestg Joseph Maria Bonnemain celebrescha l'eucaristia.

FOTOS RTR



Cardinal Kurt Koch impona al nov uvestg la gnifla episcopala.



In act simbolic: En venter sa suttametta l'uestg al papa ed a la baselgia universal.

Diocesa malsauna dovra terapia

En quest senn s'exprima il nov uvestg che è stà oriundamain medi, e blers onns derschader ecclesiastic e spiritual d'ospital a Turitg. El veglia constituir proximamain da nov ils gremis diocesans cun l'intenziun da promover sinceramain l'unitad da l'uestgieu, dentant er cun laschar flurir la diversitad. «Scadina dunna e scadin um è ina creatura custaiavla ed in messadi da Dieu», ha accentuà Bonnemain. Ed vegn pli concrets: «Provocar in l'auter, batter e blesar in l'auter, tractar umans senza respect e senza charezza, quai n'è betg cristian.» Bler da quai haja fatg vegnir malsauna la diocesa e questa malsogna stoppia vegnir curada, accentuescha il nov uvestg. El saja tuttavia conscient ch'el surpiglia in'incumbensa difficila cun numerusas sfidas. «Possia Dieu gidar nus da gughegiar da far quests pass che mainan nus ad ina cuminanza legraivla e plain fidanza en l'uestgieu, per il bainstar da la baselgia e per il bainesser da scadin singul cartent.» Tenor il ceremonial usità avess l'uestg nov consecrà gè dad ir a la fin tras la baselgia e dar la benedicziun als fidaivels. Bonnemain ha fatg il cuntrari. El è s'enclinà avant la baselgiada per retschaiver da quella la benedicziun, ed el ha engrazià persuerter. Era quai in gest simbolic dal nov uvestg.

Unir la diocesa sclavinada

Cardinal Kurt Koch ha exprimi sia speranza ch'il nov uvestg Joseph Bonnemain possa far punts ed unir la diocesa sclavinada, el dovria dentant cunzunt er la prontadad ed il sustegn dals cartents sin la via da la reconciliaziun e da la pasch. Il nov uvestg na saja dentant betg mo moderatur tranter las differentas gruppaziuns, primarmain stettia el - sco perditga da Cristus - en il servetsch da l'evangelisaziun. En sia allucuziun magistrala ha il president da la regenza Mario Cavigelli exprimi la speranza che la profunda savida, la maderizza da vita e las lungas e vastas experienschas en il gremis da la diocesa possian surventscher las tensiuns e polarisaziuns e restabilir la fidanza e confidenza en la diocesa sclavinada.

■ BONNEMAIN DAVART...

...il rumantsch

«En mes temp limità sco uvestg na vegn jau probabel betg pli d'emprender rumantsch.»

Pled final dal nov uvestg

...sias relaziuns cun l'organisaziun Opus Dei

«Opus Dei è stà mia famiglia, oz e l'uestgieu mia famiglia.»

Contribuziun en kath.ch

...ierarchias e denominaziuns uffizialas

«Cun mes 1,61 meters na sun jau betg propi ina «eccellenza», mabain plitost ina pitschna purziun.»

Intervista RTR

...la rolla da l'uestgieu

«Betg l'uestgieu e la baselgia duain star en il center, mabain ils umans e lur quitads.»

Intervista Südostschweiz

...il stadi actual da la diocesa

«La diocesa è malsauna e dovra ina terapia.»

Contribuziun en kath.ch

...ils plans da spustar la sedia a Turitg

«Dar dapli paisa a Turitg, dentant spustar la sedia episcopala fiss ina tuppada.»

Intervista RTR